



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 2

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Assam Assembly speaker-i
opposition dang azüoker

Lakhsya Sen nem Uttarakhand CM-i
sen lakh 15 agütsü



VOL. XIX NO. 77 (ADOK 77)

DIMAPUR

SANGTENNÜ (TUESDAY)

LUCHII (DECEMBER) 28, 2021

₹ 5.00

Army Inquiry Team-i Dec 29 nü Oting semdangtsü

Dimapur, December 27, 2021 (Agencies):

December 4 nü Mon district kübok Oting lendong bushisüngdangba Indian army inquiry team-i December 29 nü Oting semdangtsü.

Iba anogo parnoki Tizit police station nung nikongdang 1.30 ako nungi 3:00 ako tashi alitsü.

Indian army inquiry team-i iba tatalokba indang 'primary information' lira agüjang ta mepishia metetdaksüogo. Nisung kari osang agütsünüra Tizit police station nung arua agütsütsü akok ta PRO (Def) Kohima Lt Col Sumit K Sharma-i

sangdong nung ashi.

Taoba hopta Indian Army-i Nagaland nung alirtem dang bushisüngdang shitak dang agia arudar aser Nagaland state sorkari tentetsüba SIT den amalitepa inyaker ta metetdaksüogo.

Indian Army-i tai maketba civilian tem tepsetba ajanga Armed Forces Special Powers Act (AFSPA) tim mesüi amshiba o atsüteptsü tenzükogo.

Deobarnü Centre sorkari Nagaland nung AFSPA agientsü asadangtsü atema luden ka tentetogo. Iba high-level committee-i anogo 45 tsüngda osang agütsütsü.

NE nung mezüngbuba Omicron variant putetogo

Imphal, December 27, 2021 (Agencies):

Hombarnü Manipur nung nisung ka dak Omicron variant aliba putetogo aser iba ya Northeast nung mezüngbuba lir.

Manipur nung bendanglen alir ka dak COVID-19 indang Omicron variant puteta liasü.

Arishi küm 48 tain nisung ya tawa tu Tanzania linük nungi aru. Pa ya Imphal nung alir

aser December 21, 2021 nü pa dak Covid-19 puteta liasü.

Tatsüka lir pa indang sample ya Imphal nung genome sequencing atema yoka liasü aser idangji Omicron variant ta kuli ngutet. Pa ya tang JNIMS Hospital, Imphal nung anepaludar.

Maneni, iba nisungba'er kibong nungi nisung 3 dak Covid-19 puteta lir.

COVID-19 Nagaland: 10 dak putet & 5 taneptsü angu

Kohima, December 27, 2021 (TYO):

Nagaland nung anogo asemnü tashi nisung shinga dak-a COVID-19 meputeti aruba sülen Hombarnü nisung 10 dak putetogo.

Tanü COVID-19 putetbaji Dimapur nung dang liasü aser parnok züngsema nisung ajak

agi 32,184 kümogo.

Nagaland nung tang nisung 82 anepaludar aser 30,331 taneptsü nguogo. Taoba ghonda 24 tsüngda Dimapur nung nisung 5 taneptsü angu.

Tang Nagaland nung COVID-19 nungi taneptsü angurji 94.24% lir.

Mopung temenentiba yimitem rongnung Kohima densema lir

Guwahati, December 27, 2021 (Agencies):

Northeast nung mopung temenentiba yimitemji Assam yimtiba Guwahati aser Tripura yimtiba Agartala lir. Yimti ana sülen Nagaland yimtiba Kohima jenjang tasembuba nung lir.

New Delhi nung amenoka aliba Centre for Science and Environment (CSE) ajanga iba osang metetdaksü.

Northeast India nung mopung temenentibaji Guwahati nung lir.

Guwahati indang 2020

annual particulate matter (PM) average ji 2019 average dang nungi kanga agi teimba liasü.

Külen, Agartala nung 2020 average ji 45 micro-gram per cubic metre (ug/m3) liasü aser iba jagi Northeast nung mopung temenentiba yimti tanabubaji iba yimti lir.

Tasembuba nung Nagaland yimtiba Kohima lir.

CSE-i Assam, Meghalaya, Tripura, Nagaland, Mizoram aser Arunachal Pradesh nung 'urban air quality status' asadanga liasü.

Nagaland nungi AFSPA agientsü atema reprangshitsü

New Delhi, December 27, 2021 (Agencies):

Nagaland nung ashishitep aketba Armed Forces (Special Powers) Act agientsü asoshi asadangtsü atema Centre-i Deobarnü kanga dang temaba jenjang nung luden ka tentetogo.

India sepaitemi Nagaland nung civilian 14 tepsetba sülen tensa mejungi akümba sünepdaksütsü mechi nung iba ya inyaker ama ajiteter.

Züngsem pungu agi akümba luden nung mendenbubaji Registrar General & Census Commissioner of India, Vivek Joshi asütsü aser Union Home Ministry nung Additional Secretary Piyush Goyal-i member secretary inyaksü.

Centre-i tentetsüba luden ajanga Nagaland nung Disturbed Areas Act aser AFSPA agientsü asoshi

asadangba sülen anogo 45 tsüngda osang agütsütsü.

Bushisüngdangba maparen shitak inyakba sülen Nagaland kübok Mon district nung telungpurtem anema inyakdang tai maketba nisungtem tepsetba Army personnel dak 'disciplinary action' agitsü akok ta ketdangsurtemi ashi.

Bushisüngdangba maparen metembang tashi Army personnel mapa nungi anenja atatsü akok ta ketdangsurisa ashi.

Union home minister Amit Shah-i December 23 nü New Delhi nung senden ka ayonga amendang Nagaland CM Neiphu Rio, Assam CM Himanta Biswa Sarma, Nagaland deputy CM Y. Patton aser Naga People's Front Legislature Party leader T.R. Zeliang nung aden.

"Iba senden nung Nagaland nung AFSPA agientsü atema luden ka tentetsü lemtet. State sorkarisa MHA dang Mon district nung Assam Rifles unit melentsü atema ayongzükogo. Ajisüaka, MHA-i iba indang osang kecha magütsü lir" ta Nagaland sorkaria osang metetdaksüogo.

Luden nung züngsemtem: Dr Vivek Joshi, RG & CCI - Chairman

J Alam, CS Nagaland - Member

Lt. Gen. P C Nair, DG Assam Rifles - Member

T John Longkumer, DGP Nagaland - Member

DR M S Tuli, JD, IB - Member

Piyush Goyal AS, MHA - Member Secretary

Lt. Gen. B S Raju, DGMO - Special Invitee

Jan 3 nungi tanur nem Covid-19 vaccine agütsütsü

New Delhi, December 27, 2021 (Agencies):

Sangküm January 3 nungi India nung arishi küm 15 nungi 18 tsüngda alir nem Covid-19 vaccine agütsütsü.

Hombarnü Centre-i iba atema tetuyubatem agütsüogo.

Arishi küm 15-18 tsüngda tanurtem nem Covaxin agütsütsü ta Health Ministry-i ashi.

Arishi küm 15 ser temapur mesüra 2007 nungi asortemi vaccine agitsü atema Co-WIN nung register asütsü akok.

Co-WIN nung register süa aliba account ka ajanga 'self-register' sütetsü mesüra unique mobile number ka ajanga account tasen lapoktsü akok ta health ministry-i metetdaksü.

January 1, 2022 nungi tanurtemi tsüraburtem indang Co-WIN accounts ajanga vaccination slots mekazüka yutetsü.

Tanur vaccine agir ajaki government vaccination centre nung angati agitetsü. Ajisüaka, nija mozü ki mesüra vaccination centre nungbo sen agitsü.

Ano, January 10, 2021 nungi healthcare aser frontline workers-i tasembuba precautionary dose agitsü akok.

Arishi küm 60 ser temapurtemia doctor dang asüngdangteper vaccine tasembuba dose agitsü akok.

COVID vaccine tasembuba dose ji tanga linüktem nung meyoktepa agütsüba ama masü saka taoba mapang agir aliba kasa vaccine dang agütsütsü.

Vaccine dose tasembuba agitsü temsüa alirtem dangi SMS message yoktsü.

Centre, Nagaland aser Assam CM tem ajanga Oting lendong atalokdaksü: NPCC

Dimapur, December 27, 2021 (Agencies):

Centre sorkar aser Nagaland o Assam chief minister temi ceasefire aser Naga yimten ken o jembiba nung tetsükdaksü agütsütsü inyakba ajanga Oting nung tai maketba nisungtem tepset ama temolung melemer, ta Nagaland Pradesh Congress Committee (NPCC)-i ashi.

"Parnok külemi sendentem amendang telemtetba agibatam ajanga India sorkar aser Nagaland o Assam CM temi ceasefire raksatsütsü aser Naga yimten latetsüba mapang atsülangtsü asoshi inyakba ajanga Oting lendong atalok ta onoki temolung malemer" ta NPCC president K Therie-i ashi.

"Nagaland nung joko kiralongrar mesüra linük balaka razüka aotsü atema inyakba

telok ka danga mali kümogo anungji luden kati AFSPA asadangtsü nüngdak madoker. Oting nung nisungtem tepsetba atema temeten agütsüba nung AFSPA shilem kecha mali. Yimjung meimertem madak AFSPA benoktsü nüngdak madoker" ta pai metetdaksü.

"Parnoki tang AFSPA ajanga jenbuttsü meranger anungji state Congress-i all-party parliamentary committee ka nem Oting lendong bushisüngdang südaktsütsü takhangba agütsü" ta paisa ashi.

"Ajisüaka, AICC-i shisa kaa Gauhati High Court nung tang teinyakdak judge kati anir judicial enquiry commission asütsü takhangba agütsü, kechiyong iba ken o nung densema alirtem ya special investigation team mesüra court

of enquiry kübok madener. Parnoki tanishirtem dang asüngdangya mesütetsü" ta K Therie-isa ashi.

AICC teshimtet telok ka nem Oting nung tasür kibongtem den majurutepdaksüi noktang saka BJP minister temi parnok mesem dang, ta paisa ashi.

"Law & order ya state khuret ka lir anungji Nagaland chief minister aser home minister nati nübortem nem telangzüba agütsütsüla" ta paisa shisem.

"Nagaland nung sensotem tepsettsü atema 21 Para Special Force kechiba jaok aser kechiba Nagaland police nem osang memetetdaksü. Iba jagi Independent Enquiry Commission ka nüngdaker" ta NPCC president K Therie-isa metetdaksü.

IRCS Dimapur ajanga Ura Villa Colony nung teyari agütsü



Dimapur, Luchii/Dec. 27 (TYO): Indian Red Cross Society, Dimapur District Branch ajanga Ura Villa Colony, Dimapur nung kitsük kirong lendong ajurur alirtem denn jang bag 20, blanket 200, tent-clothes 10, mask 100 aser T-shirt 40 agüja liasü.

Item teyari ya Ura Villa Colony council chairman aser

lanurtem ajanga December 23, 2021 nü agütsü, ta sangdong ka ajanga ashi.

Item teyari agütsüba sentong nungya IRCS indang vice-chairman DDB Ajay Sethi, Honorary Secretary K. K. Paul, Treasurer Ajit Sethi, Patron Naresh Sethi & Volunteers Juel Acharjee, Kunju Nayak, Ram Panda, Kushal Sethi nungertem

dena liasü.

Onoki inyakba maparen ajanga nung yaritepba atema IRCS HO & State Branch chairman Abeni TCK aser general secretary Dr. Neiphie Kire nung dang pelar, ta Indian Red Cross Society Dimapur District Branch nung vice-chairman, Ajay Sethi ajanga sangdong nung ashi.

Chümoukedima Village Council ajanga pelaba lemsateper

Dimapur, Luchii/Dec. 27 (TYO): Nagaland nung Chümoukedima ta district 15 buba ta sangdongba atema Chief Minister Neiphu Rio-i anir Nagaland sorkar dang pelaba lemsateper, ta Chümoukedima Village Council (CVC) ajanga sangdong ka nung ashi.

State cabinet ajanga otsüsüa iba telemtetba ya agiba ajanga sorkar dak temolungtetba aser tashi aliba sayur aser iba ama

tasü tait telemtetba agiba ajanga tang tasen tentetba district nung aliba nüburtemi mapang talangka nungi aginüa aliba mangdang asangsang kumogo, ta ashi.

Chümoukedima district ya kanga mazüingi aser tashi ita renloka aoba district ka kuma Nagaland renlokba nung shilem agitsü lenmang lir, anungji CVC ajanga Chümoukedima District nung aliba yimtsüing, kin balala indang lokti tentet aser

nüburtem dang sorkar den akok tashi yariteptsü ayongzüker, ta sangdong ajanga ashi.

Nüburtemi yamaji yaritepba ajanga dang district administration tekeratiba nung amenoka maparen inyaka otettsü.

District aintsü aser renloksü atema kin ajungai shilem agitsü aser kati ka asoshi tajung inyaksütsü aser telungjem asoshi yariteptsü CVC ajanga ayongzüker, ta sangdong ajangasa ashi.

Northeast ajanga nungi AFSPA agientsüla: Meghalaya CM

Shillong, December 27, 2021 (Agencies): Nagaland nungi tashiyim aketba AFSPA agientsü atema luden shimba ajanga Northeast ajanga nungi agientsü atema asadangtsüla ta Meghalaya chief minister Conrad Sangma-i metetdaksü.

"Nagaland nungi AFSPA agientsü atema luden tentetba pelashishia agizüker. Iba atema India sorkar dang kanga pelar" ta Conrad-i ashi.

"AFSPA ya majunga aser

mapa inyaksü alizüing ayuba metongteter ta ni teti shiyonga arur. AFSPA ya meyipa agitsüla" ta pai ashi.

Union home ministry-i Nagaland aser Northeast state kar nungi Armed Forces Special Powers Act (AFSPA) tera agientsü atema lenmang bushitsü akok ta osang angazüker.

Northeast nung lenir teimba kati AFSPA agientsü takhangba agütsür saka Assam CM

Himanta Biswa Sarma-ibo par state nungi magiendaksünür.

AFSPA ya tera agien nungbo inyakyim kar melenshitsu aser state police-i law and order maparen talila benloksü ta Union Home Minister Amit Shah-i taoba mapang shiogo.

Centre sorkari December 31 matongdang telemtetba ka agitsüla kechiyong Nagaland nung 'disturbed area' agütsüba sangdong iba anogo tembangtsü.

AFSPA mechi Manipur Cabinet ajuruteptsü akok

Guwahati, Luchii/Dec. 27 (Agencies): BJP teloki yimsü asüba Northeastern state tem nungi Armed Forces (Special Powers) Act (AFSPA) agientsü akhangba tali akumba indang jembishinütsü atema Manipur sorkari anogo ka-ana tsüngta cabinet senden ka jateptsü amai lir.

Tang tesüsa ita trok atema Disturbed Areas Act sangdongba ya December 31 nü tembangtsü.

Nagaland nung aliba Cabinet

ajanga iba act ya agientsü asoshi busema pangzüing ka renema lir, aser Manipur Cabinet-ia iba act agientsü asoshi central sorkar dangi abentsü akok, ta The Hindu ajanga ashi.

Tensa tajungba akumba ajanga Congress sorkari Assembly telemsa tenet nungi AFSPA ya August 12, 2004 nung agiena liasü, ta taoba mapang Manipur chief minister inyaka alisang aser Congress lenir Okram Ibobi Singh-ia shia arur.

Sorkari Manipur nung AFSPA ya September 8, 1980 nung benoka liasü.

"Manipur Chief Minister N. Biren Singh-i pa lenisüba kübok tensa tajungba kumogo aser nübur ajungai tesunep nung mejangtettsü aser joko parnoki ayatirm nung kishi nung akoshiba mangashitsu ta shijen shia arur. Aji shidak asünungbo sorkari AFSPA ya agientsüla," ta Congress vice-president aser party odongtar K. Meghachandra-i ashi.

Silchar Christmas benjong mapang mepetmesü adok

Guwahati, Luchii/Dec. 27 (Agencies): Bajrang Dal nung züngsem ta ashiba nisung kar Assam kübok Silchar nung aliba Khristanpur tekülem ki kati Honibarnü aita Christmas benjong amungba nung timtem agütsü aser iba benjong nung Hindu nungeri shilem magitetba mechi iba benjong mamungtsü ashi.

Bajrang Dal ya right-wing telok ka lir aser BJP den tesendaktep tajung lir.

Timtem agütsürtemi Khristan temi Christmas benjong amungba atema mangatetep kechia mali saka Hindu nunger nem iba benjong memongdaksütsü, kechiaser December 25 ya 'Tulsi Diwas' lir, ta parnoki ashi.

"Onok Christmas anema masü... Khristanpur kisüing Christmas benjongdakjang. Hindu nunger tetsür aser teburtemi Christmas sentong nung shilem agiba anema onok nokdaker. Tanü ya Hindu nunger atema Tulsi Diwas liasü, saka shingia iba benjong

mamung. Iba yongji onok temolung yirur... ajaki Merry Christmas ashir. Onok yimsü komasür alitsü?" ta yangji alir kati ashiba video ka social media nung prokshia liasü.

Iba video nung nisung noklang aika Christmas süngtong ka müketa nungzütepa liasü.

Ajidang masü, iba video nung nisung kar tekülem ki kima nokdaka liasü aser police kar liasü.

Khristan tem dang Christmas benjong amungtsüla, ta parnoki ashi.

Assam police temi iba video nguogo aser nisung ana pua lir.

Silchar nung Christmas mapang iba ama timtem agütsüba ya tang mezüing masü. Taoba küm Bajrang Dal lenirtemi Hindu nunger Christmas benjong amunger dak azüktsü, ta amokmerena liasü.

Haryana kübok Gurgaon district nung Khristan pur dak timtem agütsür anogo ka sülen iba ya ataloker alitsü.

Assam Assembly speaker-i opposition dang azüoker: Akhil Gogoi



Guwahati, Luchii/Dec. 27 (Agencies): Assam Legislative Assembly nung Speaker-i opposition dang azüoker ashi ruling party pur bo maziüoker, ta Sibagar nungi MLA Akhil Gogoi-i Hombarnü tai tongloksü.

Osangbener den jembiba mapang Akhil Gogoi-i ashiba agi, Assembly session aliba mapang House indang Speaker-i opposition party tem dang azüoker saka ruling party puri aibelenba nungbo ola madoker.

House nung Chief Minister densema ruling party nung züngsemtem ajanga tongtipang

onük tem jembishinüba mapang yimya balala amshia meinpronger, ta pai ashi.

"Jembishinütsü asoshi onoki tongtipang onüktem bener aruba shia ruling party züngsemtemi ola adoka aser yimya balala amshia onük melentsü meranger," ta pai ashi.

"Tongtipang onüktem jembiba nung shilem magidaksütsü asoshi nisung kari jembiba mapang Chief Minister-ia yimya balala amshir," ta Gogoi-i ashi.

Ni onük kar benoktsü merangba shia ruling party züngsemtemi meinprongtsü aser o mejembidaksür, ta pai ashi.

Dimapur Police-i mejangjaba nisung ka nguteta lir

Dimapur, Luchii/Dec. 27 (TYO): NST building anasa tetsüing lenmang nung December 27, 2021 nü Dimapur Police temi mejangjaba nisung tebur (Naga nunger masü, arishi küm 40-45 tsüngta) ka nguteta liasü, ta sangdong ka ajanga ashi.

Ozüing agi melaba ama maparen balala inyakba sülen

iba tasü mang ya PM examination/jangjatettsü asoshi District Hospital Dimapur Morgue nung bener oa lir.

Kibur/kinunger/tembar temi Officer-in-Charge, East Police Station, Dimapur den mobile number 7085055020 ajanga tongteprateptsü akok, ta sangdong ajanga ashi.

AASU-i Agriculture minister & Dibrugarh SP na mesüka yanglur rongdok

Dibrugarh, December 27, 2021 (Agencies): All Assam Students' Union (AASU) züngsemtemi Hombarnü Agriculture minister Atul Bora aser Dibrugarh SP Shwetank Mishra na mesüka yanglur rongdoka lungkak aitogo.

Honibarnü police-i tashiyim amshia Dibrugarh AASU office telungi ia züngsemtem apuba anema parnok lungkak ait.

Dibrugarh nung aliba AASU office anasa Chowkidinghee nung tanü AASU züngsemtemi Atul Bora aser Shwetank Mishra na mesüka yanglur rongdok.

"Honibarnü Dibrugarh SP Shwetank Mishra-i kuli kecha melii dang Dibrugarh AASU office-i police telok ka yok aser züngsemtem apu. Police-i AASU züngsemtem dak tim mesüi inyak. AASU office nung computer angazüki aruba kaketshirtem apu" ta Dibrugarh unit indang general secretary Aboni Gogoi-i ashi.

"Honibarnü police-i tang mezüing atema tashiyim amshia AASU office telungi ait. Onoki chief minister Himsnta Biswa Sarma dang Dibrugarh SP merenshitsu ayongzüker" ta pai ashi.

Deobarnü AASU-i ghonda 24 Dibrugarh bandh ayongzüker saka Dibrugarh SP Shwetank Mishra-i AASU general Secretary Shankar Jyoti Baruah nem Dibrugarh bandh ayongba atema shidi ka zülü.

SP-i AASU dang shidi züluba sülen AASU-i ghonda 24 nungi ghonda 12 mokdangtsü mapang ajema liasü.

CPI Iennir Upen Talukder süogo

Guwahati, December 27, 2021 (Agencies): Communist Party of India (CPI) Iennir tejen Upen Talukder Hombar anepdang Guwahati nung süogo. Pa arishi küm 80 liasü.

Upen ya anepdang 6:30 meta Guwahati kübok pa talidak Beltola tesem nung asü.

AISF ajanga Talukdar ya communist party nung aden. Assam nung pa AITUC nung inyak aser iba telok nung dener külen nungi pai chief adviser ama inyaka aru.

Upen tasünü tashi pa ya CPI indang Assam State Committee nung züngsem ka liasü. Pai All Assam Construction Workers' Union ngutet aser iba tentet nung pa mezüing president inyak.

Life Insurance Corporation of India (LICI) nung Upen Talukdar mapa nungi anen aser pai iba party (CPI) nung aden.

"Talukdar asüba ya Assam nung party pur aser külem party nung inyaker atema takoksa tulu asütsü. Pa asüba osang angashia onok mulung züreper," ta CPI Iennir Ratul Bora-i ashi.

"CPI indang Assam State Council, AITUC indang Assam State Committee, AIKS Assam State Council aser IPTA indang Assam State Committee tenüing nung onoki asüku lemsateper," ta Ratul-i shisem.

College election ka nung ABVP züngsemtem dak tashiyim mapa inyakba atema tai tonglokja Dibrugarh police-i AASU züngsemtem apu.

"Onok ket nung kuli ajak lir aser iba nungji ajemdaker AASU züngsemtem apu" ta Dibrugarh SP Shwetank Mishra-i ashi.

December 24 nü Dibrugarh College nung election agidang AASU aser ABVP züngsemtem tsüingda mangatettep adok. Menden 13 nungi ABVP züngsemtemi 11 nung takok angu aser iba sülen parnok college kima nung benjungtep.

Idangji AASU züngsemtem arur College nung ABVP pusemertem aser kaketshirtem dak teka sangshi.

"Honibarnü AASU-i ABVP züngsem Jyotishmoy Gogoi pur

azük. Parnoki pa office-i anir ao saka Dibrugarh police-i Jyotishmoy kümzük aser AASU züngsemtem apu" ta ABVP züngsem kati ashi.

Külen, AASU züngsemtemi iba onük ya magizüker saka ABVP züngsemtemi parnok amak ta ashir.

"Sorkari onok azüoktsü merangba magizüker" ta All Assam Students' Union (AASU) Chief Advisor Samujjal Bhattacharya-i ashi.

"Dibrugarh nung apuba AASU züngsem ajak chioktsüla aser parnok nem timtem agütsürtem merenshitsu" ta Samujjal Bhattacharya-i ashi.

Sorkari onok azüoktsü merangba magizüker. Iba ya sorkar junga ketdang masüba lir" ta paisa shisem.

FORM NO. 14
[See Regulation 33(2)]

**OFFICE OF THE RECOVERY OFFICER- I / II
DEBTS RECOVERY TRIBUNAL, GUWAHATI**
Suwarna Bhawan, House No.12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE

Notice Under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule to the Income Tax Act, 1961.

**RC / 166 / 2021
BANK OF BARODA
-Versus-
I AMENLA IMSONG**

To,
(CD 1) I AMENLA IMSONG,
House No.100, Lengrijan Village, Dimapur, Nagaland- 797112.

This is to notify that as per the Recovery Certificate issued in pursuance of orders passed by the Presiding Officer, DEBTS RECOVERY TRIBUNAL, GUWAHATI in OA/108/2020 an amount of Rs. 21,21,663.05 (Rupees Twenty One Lakhs Twenty One Thousands Six Hundred Sixty Three and Paise Five Only) along with pendentelite and future interest @ 11.40% Simple Interest Yearly w.e.f. 25-02-2020 till realization and costs of Rs. 74,010 (Rupees Seventy Four Thousands Ten Only) has become due against you (Jointly and Severally).

(i) Amount due as per the Certificate Amount	Rs. 21,21,663.05
(ii) Interest from 25.02.2020 to 13.10.2021 @ 11.40%	Rs. 3,94,943.22
(iii) Costs	Rs. 74,010.00
TOTAL	Rs. 25,90,616.27

2. You are hereby directed to pay the above sum within 15 days of the publish of the notice, failing which the recovery shall be made in accordance with the Recovery of Debts Due to Banks and Financial Institutions Act, 1993 and Rules there under.

3. You are hereby ordered to declare on an affidavit the particulars of yours assets on or before the next date of hearing.

4. You are hereby ordered to appear before the undersigned on 20-04-2022 at 10:30 a.m. for further proceedings.

5. In addition to the sum aforesaid, you will also be liable to pay:
(a) Such interests as is payable for the period commencing immediately after this notice of the certificate / execution proceedings.
(b) All costs, charges and expenses incurred in respect of the service of this notice and warrants and other processes and all other proceedings taken for recovering the amount due.

Given under my hand and the seal of the Tribunal, on this date: 20-12-2021

**RECOVERY OFFICER
DEBTS RECOVERY TRIBUNAL GUWAHATI**

Form No. 3
[See Regulation-15 (1)(a)] / 16(3)

DEBTS RECOVERY TRIBUNAL GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 202 / 2021

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 1464

**BANK OF BARODA
- VS -
MR. KHEKIYE HEKIYE YEPHTHOMI**

To,
(1) MR. KHEKIYE HEKIYE YEPHTHOMI
D/W/S/O- S/o Late L. Hekiye Yepthomi, House No. 36, Chekiye Village, 3rd Mile, Near Zhimomi Automobiles, Dimapur, NAGALAND -797112.

SUMMONS

WHEREAS, OA/202/2021 was listed before Hon'ble Presiding Officer / Registrar on 15.12.2021.

WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of Rs. 87,47,676.26/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 31.01.2022 at 10:30 A.M. failing which the application shall be heard and decided in your absence.

Given under my hand and the seal of this Tribunal on this date: 16.12.2021.

Signature of the Officer Authorised to issue summons

MENUNGRA BILEMTETER



Taliozung
19:08:1932 - 28:12:2020

Onoki kodanga amatsü makokba tsürabur, asür Taliozung, iba akümlü toktsür tanü küm ka abensar. Na onok den meliaka, nü mapa aser shisa tajungtem onoki mamateter.

- Temeim kinungtsü, chirmur, semchir & kinungertem.

DEBTS RECOVERY TRIBUNAL, GUWAHATI
Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)
(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)
DRPC. No. 3365 dated 25-04-2019.
Bank of Baroda (Erstwhile Vijaya Bank), Dimapur Branch
-Vs-
Sri Chinny Magh & Ors.

To,
1. **Sri Chinny Magh,**
S/o Ashiwa Magh, House No.208, Industrial Village, Razhupe, Dimapur, P.O.& P.S.- Dimapur-797112, Nagaland (India).

2. **Mrs. Noami Bukh,**
D/o Rushvuyhum Bukh, House No. 208, Industrial Village, Razhupe, Dimapur, P.O.& P.S.- Dimapur- 797112, Nagaland (India).

3. **Sri Senilo Magh,** S/o Sri Chinny Magh, R/o House No. 208, Industrial Village, Razhupe, Dimapur, P.O.& P.S.- Dimapur- 797112, Nagaland (India).

This is to certify that a sum of **Rs. 63,76,362.00 (Rupees Sixty Three Lakhs Seventy Six Thousand Three Hundred Sixty Two only)** as per details given below has become due from you consequent to a Recovery Certificate issued by the Ld. Presiding Officer by an order dated 06-03-2019 in case No. O.A. 194/2018.

(i) Amount due as per the Recovery Certificate:	Rs. 52,68,152.00
(ii) Interest from 06.04.2018 to 20.01.2020 @ 10.30% P.A.	Rs. 10,53,210.00
(iii) Costs	Rs. 55,000.00
TOTAL	Rs.63,76,362.00

Recovery (-)

2. You are hereby directed to pay the above sum within 15 days from the Publication of this notice, failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. You are hereby ordered to declare on an affidavit the particulars of yours assets on or before the next date of hearing.

4. You are hereby ordered to appear before the undersigned on 09-03-2022 at 10:30 a.m. for further proceedings.

5. In additions to the sums aforesaid, you will be also liable for
(a) Such interest as is payable in accordance with the recovery certificate No. DRPC No. 3365 dated 25-04-2019 for the period commencing immediately after issue of recovery certificate to the date of realization, and
(b) All costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 22ND DAY OF DECEMBER, 2021.
(S. KUMAR)
RECOVERY OFFICER

Form No. 3
[See Regulation-15 (1)(a)] / 16(3)

DEBTS RECOVERY TRIBUNAL GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 201 / 2021

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 1463

**BANK OF BARODA
- VS -
MR. HYUNGWALO JESHING RENGMA**

To,
(1) **MR. HYUNGWALO JESHING RENGMA**
D/W/S/O- S/o Mr. K.Rengma, R/o H. No. E / A-1 / 01 Agri Colony, Opp. Stella Higher Secondary School, Kohima, NAGALAND - 797001

(2) **MR. KEVETSO MERO**
S/o Zupelhi Mero, New Ministers Hill, Kohima, NAGALAND STATE- 797001.

SUMMONS

WHEREAS, OA/201/2021 was listed before Hon'ble Presiding Officer / Registrar on 15.12.2021.

WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of Rs. 1,79,58,265.70/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 31.01.2022 at 10:30 A.M. failing which the application shall be heard and decided in your absence.

Given under my hand and the seal of this Tribunal on this date: 16.12.2021.

Signature of the Officer Authorised to issue summons.



TIR YIMYIM YIMOBILEM (EDITORIAL)

DIMAPUR

SANGTENNÜ

LUCHEI 28, 2021

Disciplinary masü Criminal mapa

Nagaland nung tulutiba asem, Chief minister Neiphiu Rio, Deputy Chief Minister Y. Patton aser NPF lenir T.R. Zeliang, par asem oagi Delhi nung December 23 nü kilo kilonser Amit Shah ajurua Oting nung India sepaitemi tai maketba nisung, Naga nung 14 tashi kasetba dak aketba ken o jembidang, Armed Forces Special Powers Act Nagaland nungi agientsü atema luden ka shimtsü lemtetbaji tim dang lemtetogo. Iba Committee jagi lateta yutsüba anogo 45 tsüngda nung tim teinyaktsü lemteta bener arutsü imlar. Ajisüaka, temulung masüba kaji, Amit Shah-i tatar hoho nung India sepaitemi kasetertem amenba gariji anendaktsütsü merang saka manen jena aoba agi injang yoktsüsa aküm ta metetdaksüba atema 'taidoksa' memeshiyonga 'sasaba' olen ka danga shidaktsü nungbo, Naga nung mulungjang terabo sünepla. India sepaitemi anü lia tai maketba nisungtem kaset aser ibaji metentsü kilo kilonseri parnok amenba gariji soit saka manen aoba agi parnokji khasetsüsa aküm ta tatar hoho nung metetdaksüba o agi Naga nung mulungjang kanga yirua lir. Iba o to Union Home ministerba-isa meyipa magi tashi Nagaland nung tulutiba asemi pa den jembir aruba ken o ji tejak mei mapa ka dang asütsü. Linük nung yimten tashi tulutibaji tatar hoho aser iba sabang nung ozüng yanglusang kilo kilonseri pai ngua atalok ama, Oting nungertem amenba gariji sot-aka manga aoba agi parnokji khaset ta metetdaksüba atema tesusaba o tilaka danga mashi ser bushisüngdangtsü atema "Court of Enquiry" ka tentettsüba, zülua kaliba terenemba ka azüngtsü atema shimtetba telok ka dang asütsü. Ibaji dang masü saka tejangja tai maketba nisung kasetertemjibog yimten mapa nung tera aibelenba atema 'disciplinary' temerenshi agütsütsü bushisüngdang ama masü saka nisung tepsetba mapa bushir ama bushir tai maketba nisung tepseter nem agütsütsü lateta aliba temerenshi agütsütsü tim. Ayangdak nungi amongnü kinungertem den külemi amongtsü atema pei yim bushia adokertem khaseter külenang, ano item nemji telongpur mesüka süoshi semtsütsü merangba mapa tamajung inyakerterem anema 'disciplinary proceedings' aotsü lemtetbaji tai maketba nisung tepseta yur tebang agi o tera arütsür yutsü amai asütsü. "Disciplinary action" tetezü tangar kübok mapa nung inyaker kati kibur anema tim mesüi inyakba atema arütsüba, metongshitsüsa temerenshi agütsüba, kümdangshitsü metetdaksüba aser teinyakdak mapa nungi anentsübatem asütsü. Aji oda, tai maketba Naga nung senso tajung paikaji khaseta yutsür, item nisung khasertemji mapa nungi anentsüba agi Naga nung mulung yirua alibaji süngzüksü asü? Mesüra tai maket nisung kasetertem, ano itemji kiralongrar kümtsütsü merangba nisungtem mapa nungi anentsüba temerenshi kija jagi linük nung sepaitemi tai maket nisung kasetertem tiyazü kuli agi metentsü merangba tetsütsü mapatem nokdangtetsü na? Nisung tepsetba mapa yabo 'Disciplinary' masü 'Criminal proceeding' ajanga 'first degree crimes' jenjang nung bushisüngdangtsü tim. Nisung tepsetba mapaji office mapa inyakyim nung aibelenba mapa ka masü. Ibaji 'discipline' ken o dangbo masü saka nisung tepsetba aser tasür nem tai tongloktsütsü merangba 'criminal' ken o lir. Asenoki asenoksasa 'discipline' aser 'criminal' naji mebendangtetra, asenok kanga akoksatsü aser asenok tepsetertembo linük nung tematiba 'award' angutsü. Atangji, joko taochi maka, tapi agi, tai maketba senso tajung metepsettsü atema, AFSPA ozüng ya Nagaland nungi dang masü saka Northeast nungi agientsü tim aser tasür aser teyirur kibongtem nema teyari sen den mapa agütsütsü tim. Ajisüaka, tai maket nisung tepsetertem anema tai maket nisung tepsetba temerenshi obendang magütsü tashi, Naga nung mulungbo animesüngzüksütsü.

OLEMSABANG

Lalushipong

Talimoa Longkümer

Okila

Tsüngremi moatsüba rongsen ketdangsüri timi ketdang masüi rongsen entokba dang 'lalushipong' ta Aor-i jembir. Laishibai ashir, "Shisa takar alidakji senti rongsen aser totzü lir; saka tamashi nisungi aji meyoka adoker (A. Shin 21:20). Atangji lalushipongba ya temenen aser tamashir mapa ta Lai ajanga angateter. Tanü reprangra kija aser telok aikati senti mapang, rongsen etc. aika amajok nung lalushiponga amshiba angur. YSS sabang nung iba dak sentakba tebilemstü onük ka yamai benok: "Ordination, installation amala nung rongsen jenti laluba, sati mapang decoration, Christmas New year amala nung Decoration yangluba nung rongsen jenti lalushipong asür. Ya lokti nung tebilemstü tulu lir. Koma ka inyak nung ajungtsü?" Iba dak sentakba nung sabangpur aikati shisa lemsatepba tatsü agi yamai:

Rongsen ketdangsüba

Kodang rongsen ta asür yangi mapa inyaktetsüsa tashi itta anema aliba, mapa balala inyaktetsüsa mapang peria ngutetba aser tangar dak memetaloki, sentsütsür mesüi pei peri ali rongsen/sen akaba ajak dang 'rongsen' ta ashitsü akok. Item ajak ya Tsüngrem temoatsü aser Tsüngrem nungi dang rongsenji angur. Sayutsüngir kaket-i yamai ashir, "Nisung shisa shiba nem Tsüngremi rongsen aser takaba agütsü, aser aji achitsü tashi agütsü, aser pa tia agizüksü aser pai inyakba nung tepela angutsü, ibai Tsüngrem sempet lir." (5:19). Rongsen ya kanga dang tashi (power) akaba temoatsü ka lir, saka pei ajung asaa rongsen tashiji amshia nisung kar alar kümdaktsüdir, ajemoka yutsüdir iba jagi lokti kaji raksaktsür. Ano rongsen ya dangar den melensatepi pei asoshi dang rizünga ayutsüba masü, saka lemsateptsü, yariteptsü Tsüngremi moatsü. Ano kodang rongsen amshia, talisa lokti sen miima Govt. nungi meshizüker, pei tenüng ajungkettsü asoshi amshidir, iba dangji temenen ta ajar. Tsüngrem shibai moatsür, Pa sentsüwangshi atema dang amshitsüla. Aseni tangar den lemsatepba, timi lalushipong mesüi ketdang asüba ajanga Tsüngrem sentsüwangshidaktsür ta metetdi. Rongsen lir ta sür chidiyungdiba, taka shisanga sayuba, lokti arok meyong rongsen auyaba, pei ajung asoshi dang bilemba, pei khonang atema rongsen agütsüba, telok sen ta sür mapayui amshiba, ajak ya rongsen lalushipongba nungji dena lir. Yamaji arogo nung sobaliba mapa abensadaktsür ta asüdag, Christmas and New Year benjong tulutiba anungji kecha mapayui decoration amala nung rongsen mashi lalubaji tim masü. Ibala jagi Tsüngrem sentsü mewangshidaktsür. Tatishitsü agi, Installation, Ordination, Sati, Christmas aser New Year decoration nung rongsen lalushipong kar temelenshitsü ajitetba lemsateper.

Installation sentong

Arogo nung ordination/installation mapang nung Ao lima yimtsüng arogo aika nung rongsen jenti laluba aseni angur. Secular mapa nung interview kodang takok ngudir joining report agütsürbo mapa tenzüka aor, yamaji arogo nunga office nung teinyaktsü inyakerbo installation atema sentep nung sarasadem ka dang agütsür tenzüka ao nung jungdisü? Devotional sentep Tsüngrem tenüng sanga külemstü melen meimchir tetushitepba farewell/installation agibaji tera shisadangtsü lir - T. Imti Jamir

Shiba install asür, pa/la den arogo nungi kuli ka or ana dang aja nung jungdisü ta bilemer" - Imti Longkümer

Sobaliba ya kanga tongtibang aser koba Khristan tamang den apet aji bentshitsu tim saka sobaliba bentshidang khuret kümdaktsüba ya tim masü. Sobaliba koba arogo sentongtem nung mapet ajibo melenshitsüla. Arogo nung toklang tenzüker installation mapang sobaliba onsara anitaker. Nisung 50, 60 (khen khenbo 100 tema) tashi kin kidong, anük apang ajak abensa-a bus hire süa bener arua sobaliba oshi jembia installation agir. Taru tao expenditure ajak par/la (shiba install asür) kibongi abener. Iba den arogoa rongsen aika lalur. Iba inyakyim ya melenshi nung jungdisü? Arogo ka nung Christian Education Director aser Choir Master installation sentong nung tajaba taküm kuli tatsü den sarasadem ka dang agütsür mapa nung anikokba kanga tubor junga angu. Ibala inyakyim bentshia tenzüker nung ajungtsü ta lemsatep.

Khristan tenzükerba khuret agizükba khonang ka masü, saka Yisu Khrista kilir asütsü khuret agizükba mapa ka. Taküm bendanga agütsüshiba mapang ka. Pei tashitemetet, degree, taka shisanga mapang ka masü. Tsüngrem tejak repranger ajemalua Khrista kangki aputsü ta nangzükba mapang ka. Yisu Khrista tenüng uludaktsüba dak alaka tanga sobaliba porapuji amajok lir. Ano tanga lima nung inyakyim tajungtem ajizüktepa inyaktetsüba kanga tongtibang. Tangar lima nung inyaksangshibatem junger ta ngura aji ajizüka inyakba ajanga asen lima/arogo nunga temelenshi tajung aika bener arutsü. Iba dak sentakba nung Alemla Walling, shiba America nung mapang talangka alir, lai yamai ashi: "America arogo teimba ka nung talisa Baptist arogo nung installation agidang tenzükerji pulpit-i ajatsü aser kneel down südaktsür pastorbai anir Deacon Boardtemi nemeta sarasademtsür. Lokti temulung tashibo sarasademba mapang nung noktaker. Iba dak alia talila poraloka aoba mangu." Installation sentepji tenzüker aser arogopur ajak Tsüngrem dangi meyipa akangshiba mapa ka südaktsütsüla.

Ordination nung lalushipong

Arogo nung special program, tat. agi., ordination program ama nung kokra süngo ajemba ya lemang ka nungbo junger, saka yimkong chiyungtepba ya mapet amai. Yamai inyakba ajanga arogo aser kibur atema khuret tulu küma odagi. Sati benjong ama dang talisa kiburji sentsüh aika atsür. Arogoi ordination council agizüka anepaluba dak alaka akhi mapang special program koda akar yamaji metsüngareta dang agira kecha masü ama bilemer. Sapangpur züngsem tajung kari kanga aroka shisadanga ordination inyakyim dak sentakba nung kibur/arogoi ajangshiba shisabulu tebilemstü khuret aser sentsüh-a dena lir ta lemsatep. Anungji item temelenshi tajitetba kar yamai lemsatep:

a) Ordination nung benjong agütsütepba ya ozüng yanglura nokdangtsüla. Benjong ya khonang nüngsang temaitsü saka ordination ya khuret agizükba temaitsü.

b) Tawa tanü ordination ya khuret tulu kümogo. Arogo kar nung ordain asüsangi yimer ajak nem shijep lemtsüba, arogoi sentepi arur ajak chiyungdaktsüba, kiburi ordination council nem awashi mapa inyakba, bendang lima nungi kinunger ajak jaoka amongba, ano aika. Mungdangi ozüng takhang ka meyaglura sen lakh aika entoktsü tensa kati aruogo. Sensaker asoshi ordination magitetsü mapang arudar.

c) Ordination ya Mungdang mapa ta bilemer. Anungji idaki sentakba ajak ABAM-i kuli agitsüla ta bilemer. Tat. agi., China, Thailand, South India, America-i oa külen ABAM ordination mapaji inyaktsü adok nung iba asoshi senzür pei sasa para agüja yoktsü na? mesüra ordain asür kibongi dang entoktsü na? Ana/talang ajak nung kechi tim (para dang masü DA dena) ABAM-i agütsütsüla ta bilemer. Iba mapa inyaktsü ABAM nung budget akatsü nungdak ta ajitetter.

d) Ordination tali tajungba agitsü asoshi aser lirumedema akatsü asoshi Mungdangi ya tashi inyaktsüla ta telemtetba tajung agütsüra tajungba asütsü.

Ordination sentong ama nung sen kangabo meindoktsü ajungshitepba ya junger saka ozüng agi masü tangatetba agi inyaktsü aser inyakdaktsütsü merangtsüla. Ozüng yabo aiben tamakok angur saka tangatetba agibo akoker. Anungji ibai temeshi mapa ka ta angateta sobaliba aser lalushipong makai agi tajungba ta bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



TAPESTRY LIFE, ta sür Akumla Longkumer-i adokba Christian magazine ka Dec 26 nü Fazl Ali College nung tesayur aser Straightway Christian Mission Centre Founding Chairman, Dr. Aotemshi Longkumeri sayatsüdang tangokba noksa nung angur. MTBA Assoc. Pastor, Rev. Temsuwati Kichu-i iba magazine meshiteta sarasademtsü. Iba magazine ya Mokokchung Town nung item dokan-tem nung angutsü; Student's Book Centre, CTC Book Store aser Balaka Yokya (Opp. to IDBI bank) aser Dimapur nung CLC, City Square Complex nung angutsü.

Centre-i Missionaries of Charity indang bank account shibangtsür: Mamata

Kolkata, December 27 (Agencies): Centre sorkari Missionaries of Charity indang bank account ajak shibangtsüogo; Missionaries of Charity ya Mother Teresa-i tentetba lir, ta Hombarnü West Bengal chief minister, Mamata Banerjee-i metetdaksü.

Mamata Banerjee-isa, Centre sorkari bank account shibangtsüba ajanga Missionaries of Charity-i yariba shiranger 22,000 den staff tem chiyungtsü aser mozü agi anünger, ta metetdaksü.

Lai twitter ajanga, "Khristmas mapang Union ministry-i Mother Teresa-i India nung tenzükba Missionaries of Charity indang bank account ajak shibangtsüba osang angashia aoksar. Parnoki

reprangba shiranger 22,000 aser staff tem chiyungtsü aser mozü agi anünger," ta metetdaksü.

Tawa Gujarat nunga police-i Missionaries of Charity indang orphanage anema bushisüngdang tenzükogo. Iba ya Kolkata nung Mother Teresa-i tenzükba Missionaries of Charity tenüng menüksütsü nükjidong nung inyaker asütsüa akok, ta Arogo lenirtemi bilemer.

Sorkar ketdangser kati anti-conversion ozüng nung ajemdaker ken o ka agütsüba sülen December 13 nü Gujarat kübok Vadodara yimti nung police-i Nirmala Shishu Bhavan shelter home anema bushisüngdanga liasü.

Arogo lenirtemisa, India linük tesem balala nung Khristantemi

achaayangba rejutem dak tenük yoka inyakba ama tang iba shelter home anema-a inyaker, ta metetdaksü.

Shelter homes mesüra orphanages anema yazü jembiba ajanga nüburtem nem temelung melemdaksütsü, talisa secular Hindu nungertem nem temelung melemdaksütsü nükjidong nung parnoki Khristantem anema inyaker, ta parnokisa metetdaksü.

Missionaries of Charity ya 1950 küm Mother Teresa-i Kolkata yimti nung tenteta liasü aser tangbo alima tesem balala nung Missionaries of Charity nungi nun 5,000-i shelter homes/orphanage 750 dak tema nung timtemertem aser lajartem yarir. India kija nunga item ama homes aser orphanage 243 lir.

Congo nung Khristmas anogo nung Khristan trok pokset

December 27, 2021: Congo linük nung Khristmas anogo nung Islamic kiralongrar kati taküm bendanga agüja bomb ka pokdaksüba lendong nung nisung trok pokset aser aika yiru.

Beni yimti nung atalokba lendong nungji tetsür chanu ka densema nisung trok asü aser ketdangser ana densema nisung 14 yiru.

Osangbener den jembidang radio presenter, Nicolas Ekila-i, "Ni iba tesem nungji mena liasü aser yangji motorbike ka anena liasü. Ajungbena motorbike ji apusoba sülen ola tesashi ka angashi. Security sepaitemi bomb pokdaksüsangji Khristmas sentong agiba restaurant telung jagi meyok, ibayongji pai kima bomb ji pokdaksü," ta metetdaksü.

Concern (ICC)-i, iba ya kiralongra maparen ka lir, aser iba ya Islamic telok Allied Democratic Forces mapa asütsüa akok, ta metetdaksü.

Allied Democratic Forces teloki mapang shia Khristantem amaker aser Nord Kivu o Ituri province na nung sepaitem den rarar, ajüsüaka taküm May ita nungi sepaitemi province ana nung kiralongra junga nokdangtetogo.

Beni Arogo nung tongti putiri, Khristmas anogo nung amakba ya tasümaitem mapa lir, aser iba ya kiralongrartemi tashiyim amshia par yimsü dangi meyipdaksünüba nükjidong nung inyakba mapa lir, ta aitsü.

"Tawabo security peria maliba yimtsüngtem nungang kiralongra tatalokba bulur saka parnoki yimtittem nunga

kiralongrateter ta kuli sayutsü atema parnoki meranger. Parnoki hotel ji amaksü asalentong yanglu, kechiyong Khristmas amongtsü atema Khristantem iba hotel nungji adenshütsü ta parnoki meteta liasü. Tan benjung mongpu nung Khrista ajanga tepela angubaji tetsübu ajanga menokdangtettsü. Onoki asür kibongtem atema sarasademtsür aser mangyimer," ta tongti putirisa metetdaksü.

Taküm November 30 nungi Congo aser Uganda nati longjemer Allied Democratic Forces anema rarar. Taküm küm kija nunga ADF teloki Khristan noklang aika tepsetogo aser ki aika rongdoktsüogo, aser ibaji ajanga nisung meyrjang aika jenshiogo.

ANO GO ABEN TSÜNGREM DEN

Ni langka angazüktsüla

Maka mait indang ni jembir masü, kechiaser kechi tia nungsa ni lidir, iba nungji temulung chia alitsü ni angazükogo. Filipi 4:11

Temulung achibaji langka yimya nungi aruba masü saka ibai angazüktsüla. Paul taküm nung teperi kaa aliba mapang liasü. Aikati ashir parnok teperi kaa lira temulung asütsü. Saka nai tekong 12ji züngra Paula maka-mait, machi-majem tia nunga liasü ta angur. Kodang pa Filipi tepuokdak liasü, pai mulung masü jembiasü? Pai Tsüngrem tenüng sanga ken dena liasü (T.M. 16:25). Iba dangji temulung asüba ta ajatsü akok.

Na kechi maka iba nung ranglokba dang temulung asüba ta majar. Na makaba nai aginüra iba dangji temulung asüba ta majar. Na temulung süa mali. Saka shidakba temulung asübaji na kechi aka iba nung ranglokbaji lir. Na chiyongtsü aser aben süoshi kar asü? Aji lira temulung süa liang (1 Timothy 6:8). Alima nisung aika ibajia maka lir. Na Laishiba kar asü aser nai kong külemner idakji külemtsü nüji kar asü? Aika iba ama inyaksü nüji maka lir. Na chiyongtsü, aben-süoshi kara, aser nai mulung dak külemtsü nüji kara, na Tsüngremi kanga moatsügo. Khristan ka ama na kotak nung teti tatem maka mapang indoktsü. Ibai teti tatem maka temoatsüji lir. Item temoatsütem yur, na kechi maka iba nung rangloktsü kecha kuli mali. Na Paul ama alitsü akok aser temulung süa alitsü angazükang.

Oba, tanü ni makabatem nung merangloksü, saka ni akaba temoatsütem nung rangloksü kü dang yariang. Amen.

Lotha Baptist Church Diphupar nung 49buba Khristmas among



Dimapur, December 27 (TYO): December 25, 2021 nü Lotha Baptist Church Diphupar (LBCD)-i 49buba Khristmas sentong ayongzüka agiogo aser iba sentong nung tongti o jembirji LBCD Pastor, Rev. Limhathung Lotha liasü.

'Emmanuel' omen nung ajemdaker jembidang Rev. Limhathung-i lokti dang, nenoki kechi tangatetba nung Khristmas anogo amonger?, ta asüngdanga liasü.

"Emmanuel tetezü Tsüngrem asen den lir, süra nai-a nü melungjang nung Kibur atema takdang yuja ali asü?," ta

asüngdanga pai ajaki ibaji jungjunga shisadangtsüla, ta ayongzüik.

LBCD Choir aser tetsür telok kati Khristmas ken aten, Deaconess, Liyingbeni Kikon-i Lai azüng, aser Associate Pastor, Wopansao Ovung-i tenüngsang agüja sarasadem.

Associate Pastor, Yimtsu Yanthan leniba nung iba sentong agi aser paisa Tsüngrem temoatsü meshia sarasadem. Sentong tembanga Finance Secretary LBCD, Nrinimo Humstoe-i sarasadem aser sentong piyong pianist ji CNY Director, Ajano B.Patton liasü.

OLONG PAITEP # 6036


	1				2	3			
4			5						6
						7			
	8								
	9			10			11		
						12			13
14									
						15			
		16							

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	
16. Tzü shiruru ka	- (4)	jatepba	- (4)

OLONG PAITEP # 6035 TELANGZÜBA

TIPILEN :	LANGTSÜNGLEN :
1. Lemsä, 3. Osang, 5. Mezüng,	1. Lamén, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	

Noksa nung meputepi aliba 7 bushiang



TANÜBO NAI LANGZÜANG

Q. Paxlovid ya _____ tashidak atema melaba mozü süngjang rongnung mezüng asütsü.
 [A] COVID-19 [B] Pneumococcal Disease
 [C] Cardio-vascular Disease [D] AIDS
 _____ (Taruba adok nung onoki langzüsü)
YASHIADOK TELANGZÜBA : Weight-Lifting

AO OSHI ANGAZÜKDAK:
TANÜ ANGAZÜKTSÜBA OJANG



Lon
 (n) mersü enoka yangluba chiyongtsü (relish,pickle, chutney)
 * Kütsüi aziüngkenshi lon kanga junga yanglur.

Lonbong
 (n) lon menüngba bongdang (grinding vessel for making chutney)
 * Tsüraburtemi lonbong au agi yanglur amshir.

NAI-A YA METETTER MA

India Nung Nüburtemi Sapua Aliba Smartphone Kar: December 2021

Xiaomi Poco M2 Pro 6 GB 64 GB
 Apple iPhone 11 Pro 512GB
 Vivo V17 Pro
 Xiaomi Redmi K20 Pro 6GB
 Vivo V15 Pro 6GB & 8GB
 Honor View 20
 Samsung Galaxy M20 4GB + 64GB
 Samsung Galaxy M20 3GB + 32GB
 Samsung Galaxy M10 3GB + 32GB
 Samsung Galaxy M10 2GB + 16GB
 Huawei Y9 (2019)
 Meizu C9
 Huawei Honor 8C 64GB
 Realme U1 3GB + 32GB
 Realme U1 3GB + 64GB
 Xiaomi Redmi Note 6 Pro 4GB
 Huawei Honor 8X 4GB + 64GB
 Vivo V9 Pro

SUDOKU # 6076 TELANGZÜBA # 6075

5		9	6			1	7	2	4	7	9	6	3	8	2	5	1
	7	1							5	2	3	9	7	1	6	8	4
8	2		5				3		8	6	1	4	5	2	3	7	9
3			9	4	6				1	3	8	5	9	7	4	6	2
			8		5	7			6	9	5	1	2	4	8	3	7
		5				9		8	7	4	2	3	8	6	1	9	5
4	9				8		5		3	1	4	7	6	5	9	2	8
7					1		9		9	8	7	2	4	3	5	1	6
	6				9	8	2		2	5	6	8	1	9	7	4	3

OJANG LUTEP # 5622

TSMEGRERÜN	:	<input type="checkbox"/>								
OCAHTI	:	<input type="checkbox"/>								
NNUG	:	<input type="checkbox"/>								
SKENAO	:	<input type="checkbox"/>								
KKÜÜMZA	:	<input type="checkbox"/>								
ARNI	:	<input type="checkbox"/>								
RBAAU	:	<input type="checkbox"/>								
NYOG	:	<input type="checkbox"/>								
NNNGTESAÜG	:	<input type="checkbox"/>								
TDSGAÜÜI	:	<input type="checkbox"/>								


OJANG LUTEP TELANGZÜBA # 5621
TIR YIMYIM AZÜNGER AJAK DANG KHRISTA ASOBA
BENJONG SALEM LEMSATEPER



December 27, 2021 nü Himachal Pradesh kübok Mandi nung Ato kilonser, Narendra Modi-i exhibition ka semdangba noksa nung angur.

JD(U) nungi Rajya Sabha MP, Mahendra Prasad alima nungi pilaogo

New Delhi, December 27 (Agencies): Janata Dal (United) nungi Rajya Sabha MP, Mahendra Prasad mapang talangka shiranga aruba sülen December 27 nü süogo; pa arrshi küm 81 liasü.



Mahendra Prasad

Prasad ya New Delhi nung aliba Apollo Hospital nung treatment tagidak liasü.

Pa ya Bihar nungi kümsük tenetben tashi MP inyakogo aser Rajya Sabha nung MP mapang talangtiba inyaksangji pa liasü.

Pai mezüing 1980 küm Bihar kübok constituency ka nungi Congress Party ticket nung Lok Sabha election nung toktepa takok angu, saka 1984 küm general elections nungbo tamakok angu. Ajisüaka kobi melii 1985 küm taoba mapang Ato kilonser, Rajiv Gandhi-i pa Rajya Sabha MP shima liasü. Ajioda 1985 küm nungi tenzüka pa tasünü tashi Rajya Sabha MP liasü.

Congress aser JD (U) nati dang masü saka Janta Dal aser Rashtriya Janata Dal natia pa Rajya Sabha nung züingsem shima liasü.

Pa asüba osang angashia Ato kilonser, Narendra Modi aser Bihar Chief Minister, Nitish Kumar na densema lenir aikati

mangyim jashi lemsatep.

Ato kilonser Modi-i, "Rajya Sabha MP, Dr. Mahendra Prasad asüba osang angashia jashir. Pai küm aika Parliament nung tenzükogo aser pa leniba nung nübur atema mapa tajung jenti inyakogo. Pai Bihar aser nüburtem atema jembia aruogo. Par kibong den mangyim jashi lemsateper," ta metetdaksü.

Bihar Chief Minister, Kumar-i, Prasad asüba ya lokti aser yimtenren atema takoksa tulu, ta shia pa asüba atema mangyim jashi lemsatep.

Pa mapang talangka Congress nung liasü saka state nung party jenjang mejungi akümbe sülen pai Janata Dal nung aden, iba sülen Rashtriya Janata Dal aser JD(U) na nung aden.

EC-i election agitsü aliba state tem nung Covid tensa asadang

New Delhi, December 27 (Agencies): Hombarnü Election Commission (EC)-i assembly election agitsü aliba state pongu nung coronavirus tensa asadango, iba sülen Union health secretary-i Narcotics Control Bureau dang election nung temesepba mozü amshiba mita repringtsü tuyu, ta ketdangsertem osang ka ajanga metetdaksü.

Election commission-isa ITBP, BSF aser SSB nungi tongti ketdangsertem ajurua parnok dang international arrtsülen junga mittsü tuyu.

Senden amendang health secretary, Rajesh Bhushan-i linük nung Covid tensa, talisa Uttarakhand, Manipur, Goa, Punjab aser Uttar Pradesh state tem nung coronavirus tensa election commission nem metetdaksü.

Senden nungsa coronavirus Omicron variant tensa atema-a jembiogo.

"Iba senden ya osangtem metetpelaba senden ka liasü. Health Ministry-i metetdaksüba osang nung ajemdaker election commission-i wara tensa asadang," ta ketdangser kati metetdaksü.

Health secretary-isa wara prokba nokdangtsü atema benokba Covid protocols aser home ministry tetuyubatem election commission nem metetdaksü.

NCB, Indo-Tibetan Border Police (ITBP), Sashastra Seema Bal (SSB) aser Border Security Force (BSF) nungi tongti ketdangsertem den senden amenba mapang nung Election Commission-i Narcotics Control Bureau dang election mapang nung temesepba mozü mamshitsü atema junga mita repringtsü tuyua liasü.

Sangküm March ita nung anogo balala nung Goa, Punjab, Uttarakhand aser Manipur

legislative Assemblies kümsük-a tembangtsü aser May ita nung Uttar Pradesh Assembly kümsük-a tembangtsü, anungji Election Commission-i taruba ita nungsa election agitsü anogotem sangdongtsü.

Mongolbarnüa Chief Election Commissioner den Election Commissioners-i Uttar Pradesh semdanga state nung election atema terenemshiba jenjang asadangtsü.

Taoba Brihostibarnü Allahabad High Court bench-ibo sorkar aser election commission na dang covid wave tasembuba nokdangtsü atema Uttar Pradesh assembly elections ita ka mesüra ana nokdangtsü mepishia liasü.

Iba dak sendakba nung tasüingdangba ka langzüdang CEC, Sushil Chandra-i, kobi melii EC-i Uttar Pradesh semdangtsü aser tensa apir telemtetba agitsü, ta metetdaksü.

Niti Aayog indang health ranking temaba jenjang nung Kerala lir

New Delhi, Luchii/December 27 (Agencies): India nung state tulutem rongnung health tsütsü jenjang tajungtiba state ji Kerala lir aser state tamajungtibaji Uttar Pradesh lir; 4buba Health Index ya Niti Aayog-i sayaa liasü.

4buba Health Index ranking ya 2019-20 küm tsüingda asadanga lir.

Tang agi pezüben atonga health performance temaba jenjang Kerala-i angur;

tanabuba aser tasembuba jenjangji Tamil Nadu aser Telangana nati angu.

Health tsütsü jenjang tamajungtiba state ji Uttar Pradesh lir. Jenjang tamajungtiba rongnung tanabuba aser tasembubaji Bihar aser Madhya Pradesh na lir.

Health tsütsü jenjang majungba aser terenlok maliba tsütsü tashi maittiba state ji Rajasthan lir. Telangana bo health tsütsü lenla ajak nung

renlokogo.

State tilatem rongnung health tsütsü jenjang tajungtibaji Mizoram lir aser state tamajungtiba anaji Arunachal Pradesh aser Manipur na lir.

NITI Aayog-i health index ya health tsütsü lenla 24 nungi asadanga liasü aser parnoki ministry of health & family welfare den senteper iba report yanglu. Iba dak alia iba report renemdang World Bank nungia technical teyari agia liasü.

India nung ano nisung 6,531 dak Covid putet; Omicron case 578 jungogo



Ahmedabad, December 27, 2021: Ahmedabad nung aliba Government Civil hospital ka nung coronavirus Omicron variant agi shiranger ka anepba sülen hospital staff temi pa pelaa agizükba noksa nung angur.

New Delhi, December 27 (Agencies): India nung ano nisung 6,531 dak coronavirus putet aser iba tashidak agi shiranger 315 süogo; linük nung tang tashi nung coronavirus agi shiranger 4,79,997 süogo, ta Hombarnep Health Ministry-i metetdaksü.

Tang India nung coronavirus agi teshirangdakpur 75,841 lir aser tang tashi nung iba tashidak agi shiranger 3,42,37,495 anepogo.

India nung tang tashi nung nisung 578 dak Omicron putetogo aser iba nungjagi nisung 151 anepogo, ta Health Ministry-i metetdaksü.

Amongnü Madhya Pradesh aser Himachal Pradesh na nunga tang mezüing Omicron variant putetogo, ta Health Ministry-isa metetdaksü.

Delhi nung nisung timtiba dak Omicron putet (142), iba

sülen Maharashtra (141), Kerala (57), Gujarat (49), Rajasthan (42), Telangana (41), Tamil Nadu (34) aser Karnataka (31) state tem lir. Delhi sorkari December 27 nungi night curfew tenzüka aonung 11:00 ako nungi anepdang 5:00 ako tashi curfew alitsü.

Tang India nung anogo shia coronavirus positive putetba shilem 0.87 lir aser hopta shia positive putetba shilem 0.63 lir.

Tang India nung Omicron variant kanga keraa prokba mapang nung Honibarnü Central sorkari January 10 nungi tenzüka health & frontline workers aser arrshi küm 60 ser temapurtem nem booster shots agütsütsü, ta sangdongogo.

Taküm January ita nungi coronavirus vaccine agütsü tenzüka sülen tang tashi nung vaccine dose crore 141.70 dak tema agütsüogo.



New Delhi, December 27, 2021: National Eligibility Entrance Test postgraduate (NEET PG) counselling 2021 thinenba anema Hombarnü New Delhi nung Maulana Azad Medical College kima doctor temi longkak aitiba noksa nung angur.



Bahia state, Brazil kübok Itapetinga yimti nung tzunglu kanga sashia aruba ajanga tzümeztung adokba mechi nüburtemi pei kilem kolak nung osettsüset yua aliba noksa ka yangi angur. November ita tetenzüklen nungi tzunglu kanga sashia aruba ajanga tzümeztung adoka nisung 18 takum samatsü aser yimti 30 shi nung kongshia kibong 4,000 shi pei ki yutsür aotsüsa akum, ta Bahia state sorkar indang press office ajanga ashi.

Suu Kyi anema benoka aliba ken o angadangtsüba anogo atsülangtsü

Naypyitaw, Luchii/December 27 (Agencies): Myanmar nung military court kati civilian lenir Aung San Suu Kyi anema benoka aliba ken o ana angdangtsüba anogo atsülangtsüogo, ta ken o jangjaa aliba legal ketdangtsür kati ashi. Bendanglen nungi bener aruba walkie-talkies yua aliba ken o nung la aija lir.

Linük yimtiba Naypyitaw nung benoka aliba ken o ya la anema benoka aliba ken o tem rongnung ka lir. February ka nü military-i civilian sorkar atsüngtokba sülen Suu Kyi aser tanga ketdangtsürtem anema ken o aika benoka lir.

Ken o angadangtsü atema anogo atsülangtsüba kuli okadak

ajanga tejangja magütsü ajisüaka January 10 nü ken o angadangtsü latettsüogo, ta ketdangtsürisa ashi.

Taoba küm general election Suu Kyi-i aniba party-i akok, saka military-i ashiba agi, election inyakyim nung ochi mashi ken o aika sendaka lir, ajisüaka independent poll watchers temibo election inyakyim nung ochi mashi inyakyim densema aliba merprangteter ta shiogo.

Suu Kyi pusemertem aser jurila analysts temi ashiba agi, la anema ken o benoka alibatem ya yimden yimsüsüba dak sendaka lir, aser la aitsür military-i sorkar atsüngtokba ya temzüng ozüng kübok inyakyim shidak ta

sayutsü merangdangba ka lir aser kasa mapang nung la yimden yimsüsüba nung shilem magidaktsütsü nükjidong nung inyaksangshir. La anema benoka aliba ken o tem nung lai aibelena aliba ngutetra la küm 100 dak tema tepuokdak ayutsüsa akümtsü.

December 6 nü Suu Kyi tanga ken o ana nung aija küm pezü tepuokdak ayutsü obendang agütsüogo. Obendang agütsüba sülen ghonda ishika lir military sorkar tekolakba Gen. Min Aung Hlaing-i temerenshi küm ana dang kümtsü. La tang mejangjaba tesem ka nung military-i sota yua lir aser state television-i ashiba agi, la iba tesem nung dang temerenshi agütsüba ya süitemdaktsütsü.

Ken o angadanga mapang Suu Kyi ya tepuokdak asema süoshi semer shilem agia arudar. Ken o angadanga mapang media aser teprangertem marudaktsür aser obendangertemi iba dak sendakba nung osang kecha magütsür.

(Maneni tapak 9 nung...)

Burkina Faso nung telungpuri nisung 41 tepset

Ouagadougou, Luchii/Dec. 27 (Agencies): Burkina Faso north tsütsü mepet-mesü agi sünger alidak telungpur telok temi amakba nung nisung aika asü.

Brehostibarnü atalokba azüdokshi lendong nung nisung 41 asü, ta sorkari sangdong.

Honibarnü menur sangdong ka sorkari agütsüba nung ashiba agi, asürtem rongnung sorkari nungita mitkar yaritsü asoshi amenokba civilian self-defence force Volunteers for the Defence of the Motherland (VDP) züngsemtem dena lir.

Yangji aliba osangbener temi ashiba agi, Mali arütsü nungi tatsüka arur Ouahigouya jila anasa VDP temi meiner aoba shishilembartem convoy ka dak tenük yoker mita atar amak.

Asürtem rongnung Burkina Faso nung aliba VDP indang lenir ka ta züngshia alisang Ladjji Yoro densema liasü aser iba lendong nung asürtem jangjatepba mapang lir, ta sorkari ashi.

Tajemzükba jenjang nung alirtem anioktsü mechi telungpur telok balalai Mali, Burkina Faso aser Niger nung

alu ayimer aser shiruru metsürtem tsünga tamangba yimsü amshia mepetmesü adokdaktsür.

November ita tiyonglen sepaitem aliba post ka amakdang sepai 53 densema nisung 57 tepsetba sülen Honibar lendong ya tulutiba liasü. Burkina Faso nung mitkartem hadir tajung maliba ajanga azüdokshi prokshia aoba mazüokteter.

Taoba küm mitkartem yaritsü asoshi sorkari volunteer militiamen teyari meshia liasü, saka sorkar anema telok temi meyiper parnok aser parnok yariba nüburtem dak amak.

Iba rara nung nisung 2,000 shi süogo aser ano nisung million 1.4 shi pei ki yutsür tesem balala nung jenoka lir.

Burkina Faso nung security tsütsü timtem ajurua aliba tensa ka nung ano yimtenren tsütsüa tashi mait lir.

November ita lendong atalokba sülen nüburtem ain adoka yimti yimtung nung longkak aita liasü. Sepaitem achi-ajemtsü maka hopta ana liasü ta osang angazükba ajanga nüburtem kanga jashitep.

Somalia tiri ato kilonser mapa nungi anentsü

Mogadishu, Luchii/Dec. 27 (Agencies): Ato Kilonser Hussein Roble indang tashi agientsüogo, ta Somalia Tir Mohamed Abdullahi Mohamed-i ashiba ajanga ibai tashiyim amshia sorkar atsüngdokba mapa ka dang lir, ta tai tongloktsür, koba parliamentary elections agiba nung lenir ana tsünga tai tongloktsütepba mapang ataloker alitsü.

"Ochimashi maparen den sendaktepa aliba ajanga tiri ato kilonser aser pa indang tashi ajunga agientsü telemtetba agiogo," ta tir indang office ajanga Hombarnü sangdong ka nung ashi aser ali rakzükba ken o ka bushisüngdangba nung Roble-i shilem agi ta tai tongloktsü.

Ochimashi maparen asoshi marine force commander-a bushisüngdangba aser pa mapa nungi anenja lir, ta sangdong ajanga ashi. Iba nung telangzuba agüja Roble indang office ajanga sangdong ya taoksatsüka lir ta ashi aser mitkar tashi amshia ato kilonser indang office agitsü merangba ya ozüng alema inyakba lir, ta Twitter nung ashi.

Ano post danga ka nung, Roble-i yimjung nung tashi melenzüka yuja maparen tembangtsü asoshi ajaki agizüktettsüsa election maparen inyaksü bendanga agütsür inyaker, ta ashi.

Tiri iba telemtetba agiba ya "indirect coup" ka lir, ta Assistant Information Minister Abdirahman Yusuf Omar Adala-i ashi.

"Tanep kechi ataloker, ibai mitkar tashi amshia sorkar atsüngdokba ka dang lir saka ajiaki takok mangutsü. Roble indang office müketa security forces tem yokba ajanga ato kilonseri pa mapa inyakba

nung tenokdangba malitsü," ta Adala-i Facebook nung ashi.

Hombarnü menur Twitter post ka nung, Mogadishu nung tenda tajungba kumdaktsütsü asoshi Somalia lenirtemi tekeratiba nung mera agitsü tashi agi ajungshir aser tashiyim mamshitsüla aser azüdokshi nungi pila alitsüla, ta Somalia nung aliba United States embassy ajanga ashi.

Roble-i tang tagidak parliamentary elections soita ayur ta tai tongloktsür anogo ka lir Farmaajo ta ajasang tiri iba mera ya agia liasü.

Mapang talangka nungi menua aruba elections ya November 1 nü tenzük aser December 24 tashinung tembangtsü liasü, saka Honibarnü tashinung legislator 275 aliba nungi züngsem 24 dang shimteta lir, ta tang tasen shimteta aliba legislator kati ashi.

Farmaajo indang office ajanga Honibarnü sangdong ka nung, election maparen nung Roble-i timtem tulu agütsür aser pa tashi dak alia inyaker, ta shia liasü.

Deobarnü Roble indang office ajanga sangdong ka nung tiri linük election maparen tezüdangdakja mapang, tashi aser senotsü jenti indoker aser election maparen raksatsür, ta ashi.

Election maparen tekeraba nung tembangtsü atema senden balala mena lenmangtem bushitsü aser mapang shidak nung election shidak agitsü, ta Roble-i sangdong nungsa ashi.

Somalia nung tebenja aliba indirect electoral process kübok regional councils ajanga senate ka shimtsüla. Kin balala lenirtemi lower house züngsemtem shimtsü aser parnoki tir ka shimtsü.



Denver kübok Denver International Airport nung aliba American Airlines check-in counter nung senzüsempogertem nokdaktepa aliba noksa ka yangi angur. COVID-19 tashidak mechi ketdangtsürtem anünga akumba ajanga Deobarnü Denver International Airport nung tayimtsü noklang aika thia liasü.

PELABA SANGDONGER

09/12/1985



21/12/2021

Asür **Ayimmeren Jamir**, Temjenwati Jamir (Mangmetong) er jabaso ajungben iba alima toktsür taküm pilaba mapang jentipuri ozü asüko aser mangyim mapang sarasadem, shisatsü, nübo aser rongsen agi onok mulung süngzükdakja teyari tulu agutsüba asoshi nenok ajak dang kanga pelaba sangdonger. Ozüi nenok kijashia dangi tonga arua majurutepeter anungji iba osang kaket ajanga kinünger ajak tenüng nung tajung Tsüngremi nenok talubosaa moajang ta taochi Tsüngrem dangi ozü sarasadem nung abener.

~ Loving Parents, siblings and family .

Office of the

Watsü Telen Changtongya Town

Mokokchung, Nagaland

TETUSHI AGÜTSÜR



Kr. Yangerjungla (D/o Mr & Mrs. Tianungsang Changtongya), lai Miss Ao tetoktepba nung 1st runners up aser Miss Beautiful Smile title ngutetba den Miss Mokokchung 2021 tetoktepba nung tajungtila 5 (top 5) tashi tongtet. Item takok aser khonang nüngsang bener aru nung Changtongya Town Watsü Telongjem ajanga tetushi agütsür.

Maneni Tsüngremi la taküm aser tarutsü jenjang takok nung len aniangma.

Sd/-

Wt. R. Amongla Aier
President

Sd/-

Wt. Toshimongla
Gen. Secretary

Ali Ayoker

New Showuba, Dimapur Police
Outpost selen ali ayoktsü lir.
Contact : 8131884162

Suu Kyi anema benoka aliba.. (Tapak 8 nungi..)

La okatsür, shibai osangsa agütsüya liasü, pa nema October ita osang magütsüsi atema tenokdangba agütsüogo.

Export-Import Law kübok bendanglen nungi tim lenmangi mesüi walkies-talkies bener aruba atema Suu Kyi aitsü aser iba ya la maneni sota ayuba kuli ka aküm. Iba sülen ita ka lir ozüing alema radio tem bener aruba atema la aitsü.

Radio tem ya February 1 nü lar ki meita aoba mapang lar kikümtong aser la tanükertem aliba ki nung nguteta liasü.

Suu Kyi indang okatsüri, item radio tem ya la meyong masü aser la nem security agütsüsi atema amshiba lir ta ashi, ajüsüaka okadak ajanga iba ken o ya agütsü memulunger.

Maneni taoba küm election atema nüboyimba mapang COVID-19 tetuyuba sülen manidakba atema la aitsü aliba ken o nung Hombarnü Suu Kyi- i aniba party indang vice chairman Zaw Myint Maung- i kuli agütsüba okadak angadangogo, ta legal keddangüsü yagisa ashi.

Zaw Myint Maung, shiba temang manemba ajanga taoba mapang okadak menokdakteti liasü, pai ashiba agi, lai election atema nüboyimba mapang Shwe Kyar Pin Ward semdangdang nüburtem la den

ajuruteptsü atema aru, kechiyong parnoki la kanga akhümtsübur, anungji iba ya tenokdangba agütsür aliba anema masü, ta keddangüsü ashi.

Iba aibelen ya Natural Disaster Management Law küboki aiter aser aibelen aliba ngutetera küm asem tepuokdak ayutsü aser iba den senchi achitsü.

Kasa okadak ochi mashi inyakyim dak sendakba nung ken o pongu benoka angadangdar. Item ken o tem nung aibelen aliba ngutetra ken o shia küm 15 tepuokdaki yoktsü aser iba den senchi achitsü. Ano Suu Kyi aser tir Win Myint nati helicopter alitsü aser rent asütsü atema temelaba agütsüba ken o tang tashi mangadani lir.

Tanga ken o ka nung lai Official Secrets Act nung aibelenba atema aitsüogo, aser aibelen aliba ngutetera küm 15 tepuokdaki yoktsü.

Military- i sorkar atsüingba sülen nungi tang tashi Myanmar mepetmesü tulu nung lir. Nüburtemi military anema linük ajunga nung longkak ait tenzük aser kasa mapang nung military- i tashiyim amshia nüburtem azüokba mapang nisung noklang aika tepsetogo aser aika tepuokdaki yokogo.

Sunsilk Mega Miss Northeast & Garnier Mega Mr Northeast nung Nagaland- i shilem agitsü



Chizuibe Chamlak; Lovi Jidoji; Merenzungba Longkumer; Prakash Sherestha; Venulu Nienu; Visakuo

Kohima, Luchii/December 27, 2021 (TYO): Aruya aliba regional beauty pageant tulutiba - Sun silk Mega Miss Northeast & Garnier Mega Mr Northeast, koba Mega Entertainment akhüm nung ayongzüksü, iba sentong nung Nagaland State tenüng nungi tetsür asem - Venulu Nienu, Visakuo aser Lovi Jidoji; aser tebur asem - Prakash Sherestha, Chizuibe Chamlak aser Merenzungba Longkumer nungeri shilem agitsü, ta sangdong ajanga metetdaksü.

Northeast State 8 nungi tetsür aser tebur 50 agi Sun silk Mega Miss Northeast & Garnier Mega Mr Northeast title atema tokteptsü.

Iba pageant tetoktepba nung Northeast State 8 nungi sempet tajung alir tetsür aser tebur temi shilem agiba angutsü aser iba sentong grand finale ya December 29 aser 30, 2021 nü ITA Machkhowa, Guwahati nung agitsü, ta sangdong ka ajanga Managing Director Vogue Entertainment Nagaland aser State Director, Sun silk Mega Miss Northeast & Garnier Mega Mr Northeast, Dode Nakro- i metetdaksü.

Takok angur asemprongla (tetsür aser tebur), koba takok kasa agütsüsi, parnok nem winning crown suits, cash prize, nungtugu photographer Prashant Brahma ajanga portfolio shoot, Mafiz's

academy cum studio ajanga make over den külemi Glam Mantra ajanga takok angur team atema public relations aser reputation management densema sen lakh 2 alang sempet agütsüsi renema lir.

Iba den bendenloksema, takok angur nem Mega Entertainment ajanga professional representation aser personal wardrobe styling agütsüsi, koba professional sabang nung parnoki (takok angurtem) tasüita shilem agitsü asoshi nungittsü.

Maneni, iba sentong nung takok angurtemi nungtugu fashion sentong balala nung shilem agitsü asoshi maangka angutsü, ta kasa sangdong nung shia lir.

Mushtaq Merchant alima nungi pilaogo

Mumbai, Luchii/December 27, 2021 (Agencies): Hombarnü Bollywood actor aser comedian Mushtaq Merchant süogo. Mushtaq ya arishi küm 67 tain liasü aser Mumbai kübok Holy Family Hospital nung pa asü. 'Saagar' nung tongti shilem agisang Mushtaq ya mapang talangka nungi diabetes agi kangshia liasü.

Mushtaq- i Bollywood film balala nung shilem agiogo aser

item rongnung 'Haath Ki Safai', 'Jawani Diwani', 'Seeta Aur Geeta' aser 'Saagar' dena lir.

Amitabh Bachchan aser Dharmendra nati tongti shilem agiba film 'Sholay' nunga pai shilem agia liasü, saka film kanga talang asüba yong edit (final edit) asüba mapang iba nungtugu film nungi pa (Mushtaq) indang shilem agienadok.

IMDB sangdong ajanga

angazükba agi, 'Sholay' nung Mushtaq Merchant- i shilem ana agi. Iba film nung pai train driver ama mezüng shilem agi aser tanabuba nung 'Yeh Dosti Hum Nahi Todenge' ken metenzükdang Jai aser Veeru nati pa indang motorcycle auyaba indang shilem asütsü.

Tesüiba küm 16 nungi Mushtaq Merchant- i film maparen toktsü. Iba sülen pai tamangba maparen nung temulung agüja inyaka aru.

Spider-Man: No Way Home ajanga \$1 billion aazükogo

Mumbai, Luchii/December 27, 2021 (Agencies): Marvel indang film tasen Spider-Man: No Way Home ajanga Christmas mapang box office record timba yangluogo. Deobarnü, 'No Way Home' ya alima ajunga nung Covid-19 wara adoker külen nungi billion dollar jenjang nung aazükba film rongnung mezüng kümogo.

Taoba hopta film tasen balala sayaogo aser box office nung Matrix film tasen ajanga toktep yongjia, No Way Home yagi North American box office ajunga amokbanga lir, ta industry watcher Exhibitor Relations sangdong ajanga metetdaksü.

Spider-Man: No Way Home, koba Marvel Cinematic Universe nung Tom Holland indang solo film tasembuba asütsü, North America nung iba film ajanga \$467.3 million aazükogo aser alima tesem balala box office nungi \$587 million aazüka lir.

Iba film sayar anogo 12 tema nung \$1 billion dang timba aazükogo, ta AFP sangdong ajanga metetdaksü. Film analyst temi takzüba ama, iba film ajanga alima ajunga box office nung takok tulu nguogo.

Sangdong ajanga angazükba agi, film ana agi \$1 billion alizüng kara tongteta lir, koba Avengers: Infinity War aser Avengers: Endgame asütsü. Film anaprongla sayar anogo 11 nung billion dollar alizüng tongteta liasü.

Omicron Covid-19 variant kanga sashia proka aoyongjia, box office balala nung 'No Way Home' ajanga takok tulu ajangzükttetba ya tesümanngtsüka lir.

AFP sangdong ajanga angazükba agi, North America nung kasa mapang film tasen balala sayaogo, ajüsüaka Spider Man: No Way Home ajanga box office ajunga amokbanga arudar. North America nung Christmas hopta anogo asem

tashi iba film ajanga \$81.5 million aazüka liasü aser iba den külemi box office nunga temaba jenjang tongtet.

Sing 2 film ajanga \$23.8 million aazüka liasü aser Universal indang film ajanga runners-up jenjang tongtet. Sing 2 ya Sing den tatongtep film ka asütsü. Ano, Spiderman: No Way Home ajanga tanga installment series tasen ana tashi ajateta liasü.

'The Matrix Resurrections', kong Keanu Reeves- i tanaben Neo ama shilem agir, iba film ajanga \$12 million dang aazük. Pezübuba jenjang nung Kingsman film indang spy prequel - The King's Man liasü aser film ajanga \$6.4 million aazükogo.

Jon Watts- i direct asüba Spider-Man: No Way Home nung Tom Holland den Zendaya, Benedict Cumberbatch, Willem Dafoe, Alfred Molina, Tobey Maguire, Andrew Garfield aser Jamie Foxx nungeri tongti shilem agiba nguogo.

Lakhsya Sen nem Uttarakhand CM-i sen lakh 15 agütsü



Luchii/December 27, 2021 (Agencies): Uttarakhand Chief Minister Pushkar Singh Dhami-i badminton asayar Lakhsya Sen nem tetushi agütsüogo. Lakhsya-i, BWF World Championships, 2021 nung takok tajung ngutetba atema iba tetushi agüja liasü.

nung bronze medal ngua liasü, pa ya Uttarakhand kubok Almora district nungi lir.

Chief minister-isa, Sen'er tsürapur nem tetushi agütsü aser taruba world badminton championships nungbo Sen-i gold medal angutsü imlaba lemsatepa liasü.

Maneni pai, lanur asayartem sempet arangtetshitsü atema maongka timba agütsütsü nükjidong nung state sorkari sports policy tasen benokba indang lemsatepa liasü.

State nung sports university ka amenoka lir aser iba den Udham Singh Nagar district nung women's sports college ka amenoka lir, ta Dhami-i ashi.

Martial-i Manchester United toktsüner: Ralf Rangnick

Luchii/December 27, 2021 (Agencies): Anthony Martial-i, Manchester United toktsütsü atema asingdangogo, saka tang tashi offer kecha agüja mali aser asayartem aika yirur aliba den COVID-19 tashidak timba potetra club-i pa mechioki ayutsüsa akümtsü, ta interim manager Ralf Rangnick-i ashi

Arishi küm 26 tain asayar ya iba season nung league asaya ana nung dang tetenzük nungi asaya lir aser pa indang representative-i iba ita ashiba agi, pa asaya timba nung shilem agitsü atema January ita club toktsüner oner ta shiogo.

"Onok Bodhbarnü mapang talangka sensaksemogo. Pai pa United nungi küm tenet asayaogo aser temelenshi ka atema tang ya mapang tajung ta bilemba lemsatepogo.

"Kasü ka nungbo pai ashibaji



Senior Indian women's hockey camp tenzükogo

New Delhi, Luchii/December 27 (Agencies): Senior women's national hockey camp Hombarnü Bengaluru, Sports Authority of India south centre nung tenzükogo. Iba camp nung asayar 60-i shilem agidar.

Asayartem ya tawa tembangba 11buba senior women's national championship, inter-department national championship aser Hockey India indang domestic asayamung balala nung asayaba dak ajemdaker shimogo.

Züngsem 60 rongnung senior women's core group nung züngoksema alirtema densema lir. Parnok ya International asayamungtem nung asayaba dak ajemdaker shimogo, ta Hockey India sangdong ka ajanga metetdaksü.

Maneni junior women's team nungi junga asayaba asayartema shimogo. Taruba küm women's Asia Cup atema

renemshi metenzük tsüngda asayartem asaya yimya asadangba sülen asayar 33 shimtsü.

"Asayartem ya international jenjang nung senior aser junior tetsür asayamungtem, Senior Women National Championship 2021, 1st Senior Women Inter-Department National Championship 2021 aser tanga domestic asayamungtem nung shilem agiba temulungdang yur shimogo.

"Asayartem timba taoba mapang 33 senior women's core probable group nungi lir aser parnoki final list nung züngoksemsü atema trials mapang junga asayatsü nungdaker ta angateta lir," ta women's team chief coach Janneke Schopman-i ashi.

Asayartem yamai alitsü:
Goalkeepers: Savita, Rajani Etimarpu, Bichu Devi Kharibam, Alpha Kerketta, Sheweta, Susmita Patil
Defenders: Deep Grace

Ekka, Gurjit Kaur, Nikki Pradhan, Manpreet Kaur, Rashmita Minz, Suman Devi Thoudam, Mahima Choudhary, Gagandeep Kaur, Uditia, Akshata Dhekale, Ishika Chaudhary, Marina Lalramnghaki, Priyanka, Reet, Reema Baxla, Anjali HR, Renuka Yadav, Mudita

Midfielders: Nisha, Salima Tete, Pukhrabam Sushila Chanu, Jyoti, Navjot Kaur, Monika, Lilima Minz, Namita Toppo, Reena Khokhar, Mariana Kujur, Sonika, Neha, Ajmina Kujur, Baljeet Kaur, Sushma Kumari

Forwards: Rani, Lalremsiami, Navneet Kaur, Rajwinder Kaur, Vandana Katariya, Sharmila Devi, Deepika, Jiwan Kishori Toppo, Lalrindiki, Sangita Kumari, Archana Bhardwaj, Sarabdeep Kaur, Navjot Kaur, Jyoti, Monika Sihag, Preeti Dubey, Raju Ranwa, Arya KM, Upasana Singh, Dipti Lakra, Aishwarya Chavan.

Ravi Shastri-i captain mapa lemdangtsüba pusemer

Mumbai, Luchii/December 27 (Agencies): Taoba India cricket team coach Ravi Shastri-i red aser white ball format atema captain mapa lemdangtsüba pusema jembioogo aser ashiba agi, iba ya inyakyim shidak lir.

Virat Kohli-i maneni Test captain mapa bena lir aser T20 aser ODI captain mapa Rohit Sharma nem agütsüogo.

"Iba ya inyakyim shidak ta bilemer. Iba ya Virat aser Rohit atema temoatsü asütsü ta bilemer, kechiyong tang bubble balala nung asayaa senzüba ya ano küm ka ana atsülangra nisung kati dangbo ajak ayimjema inyaksü tasak asütsü," ta Shastri-i Star Sports show 'BOLD & BRAVE: THE SHASTRI WAY' sensaksem sentong nung ashi.

South Africa nung oa masaya tsüngda osangbenertem den sensaksemba mapang Kohli-i, pai T20 captain mapa toktsütsü ta sangdongba sülen pa dang iba mapa maneni abentsü atema shingaia mashi, ta ashi.

Shastri, shibai lenla balala nung Indian cricket tenzükogo, paisa Rohit ya opener ama asayadaksüner.



"Ni inyaknüba kü mulung nung tejangja liasü. Batsmen ka ama Rohit-i tajungtiba asayatetdaksütsü atema ni minyaktera coach ka ama ni tamakoker ka asütsü ta ni bilem, kechiyong pa kanga sempet tajung lir," ta Shastri-i ashi.

Kasa mapang nung arishi küm 59 tain asayar, shibai Test 80 asayaogo, paisa Kohli den pa tesendaktep indang jembu, shiba Shastri head coach asüba mapang ODI aser T20 captain liasü.

"Künaprongla aggressive aser künapronglai akoktsü atema dang asayanü. Akoktsü atema wicket 20 agitsü nungdaker ta angatet aser tetsübu kecha makai aggressive süa asyatsü lemtet.

"Mapang kar nungbo tamakok angutsü saka takokji jangrademtsüka," ta paisa ashi.

Andrey Rublev dak COVID potet



Luchii/December 27, 2021 (Agencies): Iba ita Abu Dhabi nung exhibition asayamung ka nung asayar ishika dak Covid tashidak potetogo aser tang World number 5 asayar Andrey Rublev daka covid potetogo, shiba iba asayamung asayaa liasü.

Spain nung asayar Rafa Nadal, Canada nung asayar Denis Shapovalov, Switzerland tsür Olympic champion Belinda Bencic aser Tunisia tsür Ons Jabeur nung asayaba sülen covid tashidak poteta liasü.

Iba asayamung metenzük tsüngda U.S. Open champion Emma Raducanu daka Abu Dhabi nung covid poteta liasü aser Nadal indang coach Carlos Moya daka tashidak potetogo.

Arishi küm 24 tain Rublev, shibai December 18 nü World Tennis Championship final nung Andy Murray koka liasü, pai iba

osang ya Twitter ajanga lemsatepogo.

"Ni tang Barcelona nung lir aser tia maka COVID-19 tashidak potetogo. Ni lokti nungi pilaa lir aser doctor tem tawabangba nung inyakyim ajak sülen tashi angaa anidakdar," ta Russia nung asayar yagi ashi.

"Ni vaccine dose anaprongla agiogo aser ATP Cup aser Australian Open atema renemshia liasü. Ni temang anepalutsüsa kümogo aser ni ajanga tangar nem timtem magütsütsü ta jangjaba sülenang Melbourne-i aotsü," ta paisa ashi.

Australian Open ya Melbourne Park nung January 17 nü nungi tenzük asayatsü. Taküm tebur ATP Cup akokba Russia team nung Rublev-a densema liasü aser Sydney nung asayatsü aliba asayamung atemaa pa züngoksemer liasü, koba Honibarnü tenzüktsü.

BILEMDANGANG

"Timla samara taküm samadoktsü."